

De Weihnachtsgans

Von Heinrich Nesbach, Bucholtswelmen



„Seg, Meister“, säd de kleinen Teut,
„op Weihnach maak eck dech en Freud!“

„So“, säd de Meister, „dat ös allerhand,
dor bön eck doch es op gespannt.“

Et woor so drij-vier Wääk bös Weihnach noch,
de Meister had nit mer doran gedoch.

Doch sag noch tiinmol wel de kleine Teut:
„Op Weihnach maak eck dech en Freud!“

De Meister doch, dat sal wat gäwe,
wat mag eck Weihnach wel beläwe.

De Fierdag koome nau so langsam aan,
duj woord Teut stell, äs doch heij nit mär dran.

De Fierdag woren nau ock endlech dor,
de Chrisbööm stunnen in de Kamers klor.

On löchten dör de Rutten op de Stroot.
De Meister mät de lange Piip dor soot.

Heij loos in't Buuk grad van de Weihnachtsmann;
on doch op eenmol wer doran,

wat öm vöör Wäken had gesag den Teut:
„Seg, Meister, Weihnach maak eck dech en Freud!“

De Fierdag wor'n vörbeij on ock Nejoor,
De Ferien üt — de Pöös wor'n al wer door.

On leerden fresch drob los — ock onsen Teut,
den maaken wol sin Meister ene Freud.

Doch bej dat Leere wor dat mär so — so —
dor miik heij öm gar nit besonders froo.

On in de Pause op den Hoff
häd heij öm sech nau ens gekoff.

„Seg, Teut, wor ös min Freud gebleewen dan
doj häs doch ömmer so geprot dorvan?“

„Och, Meister, dor höb eck wel dran gedach,
mär: ‚Sej frät wer!‘ häd Moder duj gesag.“

